

**ԳԻՏԱԿԱՆ ՆՍՏԱՇՐՋԱՆ՝ ՆՎԻՐՎԱԾ ԳԱՐԵԳԻՆ ՍՐՎԱՆՁՏՅԱՆՑԻ
ԾՆՆԴՅԱՆ 125-ԱՄՅԱԿԻՆ**

1965 թ. դեկտեմբերի 28-ին կայացավ Հայկական ՍՍՌ գիտությունների ակադեմիայի հնագիտության և ազգագրության ինստիտուտի գիտական նստաշրջանը՝ նվիրված հայ մշակույթի ականավոր գործիչ Գարեգին Սրվանձտյանցի ծննդյան 125-ամյակին:

Ներածական խոսքով նստաշրջանը բացեց Հայկական ՍՍՌ ԳԱ հնագիտության և ազգագրության ինստիտուտի դիրեկտոր, դոկտոր-պրոֆեսոր Բ. Առաքելյանը: Նա բնութագրեց խոշոր րանագետի, ազգագրագետի, մանկավարժի, հասարակական-քաղաքական գործչի բազմաբնույթ գործունեությունը, ընդգծելով նրա գերը հայ ժողովրդի հոգևոր մշակույթի ուսումնասիրության գործում:

Գ. Սրվանձտյանցի կյանքի և բանագիտական գործունեության մասին զեկուցեց Հայկական ՍՍՌ ԳԱ թղթակից-անդամ Ա. Տ. Ղանալանյանը:

Գ. Սրվանձտյանցը ծնվել է 1840 թ. դեկտեմբերի 12-ին Վանի Այգեաստան թաղամասում: Տեղական վարժարանն ավարտելուց հետո, նա մեկնում է Վարազ և ընդունվում տեղի ժառանգավորաց դպրոցը, որի ղեկավարն էր Մկրտիչ Խրիմյանը:

Գ. Սրվանձտյանցը իր առաջին գրական քայլերն սկսել է 19-րդ դարի 60-ական թվականների սկզբին, տպագրելով իր աշակերտական ոտանավորները և հայրենասիրական հոդվածները «Արծվի Վասպուրական» ամսաթերթի էջերում: Վարազա դպրոցն ավարտելուց հետո Մ. Խրիմյանի կողմից կարգվում է նույն դպրոցի ուսուցիչ և «Արծվի Վասպուրական» թերթի փոխմամբագիր: Այդ շրջանում նա սկսում է աշխատակցել Պոլսի, Իզմիրի, Թիֆլիսի մի շարք պարբերականներին, ուր տպագրվում են նրա պաշտոնական ուղևորությունների ժամանակ գրի առած զրույցները, երգերը, ասացվածքները, առակները և այլն:

Ժողովրդի կյանքին ու կենցաղին մոտիկից ծանոթանալու համար Սրվանձտյանցը Մ. Խրիմյանի հետ շրջագայության է դուրս գալիս Արևմտյան և Արևելյան Հայաստանի զանազան գավառներ իրեն նվիրակ ու քարոզիչ՝ Վերադառնալով Մուշ, նրանք իրենց հավաքած նվիրատվություններով դպրոց են բացում Ս. Կարապետի վանքում և հիմնում «Արծվիկ Տարոնո» պարբերաթերթը: 1864 թ. նա ձեռնադրվում է վարդապետ և ուղարկվում Վան իրեն քարոզիչ:

1868 թ. Սրվանձտյանցը նշանակվում է Կարեն ուսումնարանների լիազոր-տեսուչ: Մեծ կարևորություն տալով մայրենի լեզվի ուսուցմանը, Գ. Սրվանձտյանցը կազմում և հրատարակում է դասագիրք-ընթերցարաններ, որոնք արժանանում են բարձր գնահատականի: 1892 թ. դեկտեմբերի 12-ին, 52 տարեկան հասակում, Գ. Սրվանձտյանցը վախճանվում է:

Բացառիկ է եղել Սրվանձտյանցի կատարած դերը հայ բանահյուսության բնագավառում: Նրա անվան հետ է կապված մեր ազգային-ժողովրդական մեծ վեպի՝ «Ասասնա ծոերի» («Աստուցի Դավիթ») հայտնագործման փաստը: Նրա թողած ժառանգության մեջ կարևոր տեղ են գրավում ուղեգրական և հնախոսական երկերը: Առանձնապես արժեքավոր է «Թորոս աղբար» ուղեգրական աշխատությունը: Նրա զլուխ գործոցներից են «Գրոց ու բրոց», «Մանանա» և «Համով-հոտով» բանահյուսական ժողովածուները: Հիշարժան են նրա երկու տասնյակից ավելի ժողովրդական հեքիաթները և ժողովրդական ավանդությունները, ցրված տարբեր ժողովածուներում:

XIX դարի սկզբին ծնունդ առած հայագիտությունը ընդգրկում է նորանոր մարզեր: Ասպարեզ են գալիս մասնագետ բանահավաքներ, բանագիտությունը հետզհետե ձևավորվում է իրեն հետազոտության ինքնուրույն բնագավառ: Գարեգին Սրվանձտյանցը հանդիսացավ հայ բանագիտության հիմնադիրներից մեկը: Պատմական գիտությունների թեկնածու Վ. Հ. Բզոյանի զեկուցումը նվիրված էր Գ. Սրվանձտյանցի ազգագրական գործունեության բնութագրմանը:

Գ. Սրվանձտյանցն իր ուղևորությունների ընթացքում մոտիկից ծանոթանում է գեղջկական կենցաղին ու սովորույթներին, առտին կյանքին ու ձգտումներին. դեռևս 1860 թ. ճանապարհորդելով Անդրկովկասի և Պարսկահայքի գավառներում, գրում ու հրատարակում է «Երևան քաղաք», «Տփլիս քաղաք», «Սյունյաց աշխարհ և Շուշի քաղաք» հոդվածները, ուր ակնարկների ձևով ներկայացված է հայ, վրացի և այլ ժողովուրդների ազգագրական պատկերը:

Գ. Սրվանձտյանցն իր հրպտարակած ժողովածուներով գիտական հողի վրա գրեց ազգագրական և բանահյուսական նյութերի գրառման գործը: Եթե խ. Արովյանը, Պ. Պոռչյանը, Ռաֆֆին և ուրիշները ազգագրական նյութերը ծառայեցրել են գեղագիտությանը, ապա Գ. Սրվանձտյանցը գեղագիտությունն է ծառայեցրել աղղագրությանը:

Բազմաթիվ ու բազմազան են Գ. Սրվանձտյանցի հավաքած և հրատարակած ազգագրական նյութերը, որոնք ցրված են «Գրոց ու բրոց», «Մանանա», «Թորոս աղբար» և «Համով-հոտով» ժողովածուների մեջ: Դժբախտաբար, մեզ հասել է Գ. Սրվանձտյանցի հավաքած ազգագրական նյութերի մի մասը միայն: Ժամանակի քաղաքական հանգամանքների բերումով այդ նյութերը մասամբ անհետ կորստի են մատնվել, իսկ մնացածները կրակին են հանձնվել Գ. Սրվանձտյանցի ողջ արխիվի ու գրադարանի հետ միասին: Իր ժամանակին հայ մտավորականներ Ղ. Ալիշանը, Մ. Էմինը, Գ. Խալաթյանցը և այլոք ըստ արժանվույն գնահատել են Գ. Սրվանձտյանցի ծառայությունները: Այսօր էլ հայ ժողովրդի մշակույթի երախտավորների շարքում իր պատշաճ տեղն է գրավում Գ. Սրվանձտյանցը: Նա առաջիններից մեկն էր, որ արձագանքեց ժամանակի հրատապ պահանջին՝ մեղվաչան հավաքեց և ամենքին ի ցույց դրեց հայ ժողովրդի հոգևոր գանձերը, դրանք փրկելով հետագա կորստից, վերստին վերադարձնելով ժողովրդին:

Լ. ՊԵՏՐՈՍՅԱՆ